



Broj: 02-04-353/24-AP-3
Datum: 18.03.2024. godine

Na osnovu člana 3. stav (2) tačka d) i člana 4. stav (15) Zakona o komunalnim djelatnostima Zeničko-dobojskog kantona („Službene novine ZDK“, broj: 17/08 i 09/11) i člana 10. Privremene Statutarne Odluke Grada Zavidovići („Službeni glasnik Općine Zavidovići“, broj: 4/22) donijelo je

O D L U K U
o upravljanju i održavanju mezarja - groblja na području Grada
Zavidovići

DIO I - OSNOVNE ODREDBE

Član 1.
(Predmet Odluke)

Ovom Odlukom se uređuje način upravljanja mezarjima - grobljima u vlasništvu Grada Zavidovići, formiranje novih mezarja - groblja, uslovi uređivanja i održavanja mezarja - groblja, uslovi za ustupanje i način utvrđivanja naknade za korištenje mezarjskih - grobnih mjesta, uslovi za izgradnju grobnica, nadgrobnih spomenika, prijenos posmrtnih ostataka do mezarja - groblja i održavanje mezarja - groblja u vlasništvu vjerskih zajednica, mjesnih zajednica i fizičkih lica.

Član 2.
(Pojam)

(1) Mezarje - groblje je dobro od općeg interesa i u smislu ove Odluke smatra se zemljištem koje Grad Zavidovići putem nadležne službe odredi za sahranu umrlih, kao i objekti i uređaji koji su izgrađeni na mezarju - groblju i služe za sahranu umrlih i korištenje mezarja - groblja.

(2) Mezarje - groblje iz stava (1) prethodnog stava smatra se zemljištem koje se već koristi za sahranjivanje umrlih i to:

- a) Žigića mezarje na zemljišnim parcelama u vlasništvu Grada Zavidovići,
- b) Mezarje Flos na zemljišnim parcelama u vlasništvu Grada Zavidovići,
- c) Ostala mezarja - groblja koja Grad Zavidovići izgradi nakon stupanja na snagu ove Odluke (U daljem tekstu mezarje - groblje u upotrebi).

Član 3.
(Lokacija novih mezarja - groblja)

Lokacije novih mezarja - groblja na području Grad Zavidovići određuje se planskom dokumentacijom iz oblasti prostornog uređenja.

DIO II - IZGRADNJA, UREĐIVANJE I ODRŽAVANJE MEZARJA - GROBLJA

Član 4.

(Izgradnja, uređivanje i održavanje)

(1) Izgradnja mezarja - groblja se vrši na način i pod uslovima utvrđenim Zakonom o prostornom uređenju i građenju ZDK („Službene novine ZDK“, broj: 17/23) i drugim propisima koji regulišu ovu oblast.

(2) U skladu sa stavom (1) ovog člana izgradnja mezarja - groblja se vrši na prostoru koji je namijenjen kao površina za izgradnju mezarja – groblja u planskim dokumentima Grada Zavidovići.

(3) Uređivanje, održavanje i upravljanje mezarjima - grobljima u upotrebi povjerava se JKP „Radnik“ d.o.o. Zavidovići (U daljem tekstu: JKP „Radnik“), koje je obavezno osigurati uslove minimalne tehničke i stručne osposobljenosti za obavljanje komunalnih djelatnosti održavanja mezarja - groblja u skladu s posebnim propisima.

Član 5.

(Odobrenje za građenje)

(1) Odobrenje za izgradnju, uređenje i proširenje mezarja - groblja izdaje služba za upravu Grada Zavidovići nadležna za poslove prostornog uređenja i građenja.

(2) U mezarju - groblju u upotrebi mogu se graditi objekti (mrtvačnice, kapele i sl.) za obavljanje ispraćaja i sahrane umrlih lica.

Član 6.

(Mezarja - groblja pod posebnom zaštitom)

Uređivanje i održavanje mezarja - groblja koja se nalaze pod posebnom zaštitom (mezarja - groblja boraca i spomen-obilježja) vrši se u skladu sa posebnim propisima.

Član 7.

(Obaveze pravnog lica)

(1) JKP „Radnik“ dužno je izvršiti:

- a) čišćenje mezarja - groblja i odvoženje otpadaka, starih vijenaca, pokošene trave i suvišne zemlje,
- b) redovno košenje trave koja na slobodnim površinama i prilaznim stazama može biti visoka najviše 10 cm,
- c) redovno okopavanje i obrezivanje drveća kao i održavanje cvijetnih gredica izvan mezarjskih - grobnih mjesta,
- d) čišćenje i održavanje objekta na mezarju - groblju (mrtvačnice, sanitarne prostorije, ograde, putevi, rasvjeta na otvorenom prostoru kao i druge instalacije),
- e) uklanjanje vijenaca, ikebana, buketa cvijeća, i sl. po isteku roka od 40 dana nakon sahrane,
- f) održavanje i uređivanje mezara - grobova na zahtjev porodice umrlog ili drugih lica uz naknadu,
- g) uklanjanje posuda sa cvijećem,
- h) druge poslove u skladu sa ovom Odlukom.

(2) Održavanje i uređenje mezarja - groblja u upotrebi vrši se na osnovu Programa uređenja i održavanja mezarja - groblja u upotrebi koji donosi JKP „Radnik“ uz prethodnu saglasnost službe za upravu Grada Zavidovići nadležnu za komunalne poslove.

Član 8.
(Zabranjene radnje)

Na mezarjima - grobljima u upotrebi nije dozvoljeno:

- a) prljati mezare - grobove, puteve, staze, uređaje i instalacije,
- b) obavljati bilo kakvu trgovinu,
- c) vršiti prosjačenje,
- d) vršiti narušavanje reda i mira,
- e) dovoditi pse i druge životinje,
- f) napasati stoku,
- g) oštećivati mezare - grobove, spomenike, nadgrobne oznake i ostale objekte i instalacije,
- h) trgati i odnositi cvijeće,
- i) postavljati natpise, slike i reklame protivne moralnim normama,
- j) saditi voće,
- k) ulaziti vozilom u mezarje - groblje, izuzev specijalnih vozila namijenjenih za prevoz umrlih i specijalnih građevinskih vozila koja služe za izvođenje planiranih zahvata na zemljištu,
- l) vršiti druge radnje i poslove koji su suprotni postojećim propisima i ovoj Odluci.

Član 9.
(Pravila ukopa)

- (1) Mezarje - groblje u upotrebi mora biti ograđeno i održavano u urednom stanju.
- (2) Mezari - grobovi se planiraju i postavljaju na način da se za jedan mezar - grob zauzme minimalna potrebna površina za ukop.
- (3) Sahranjivanje - ukop umrlih po pravilu se vrši u redove.
- (4) Dužina mezara - groba može biti do 2,30 m, a širina do 1,0 m.
- (5) Dubina mezara - groba od površine zemlje iznosi najmanje 1,80m.
- (6) Širina staza između redova mora biti 1,0 m.
- (7) Razmak između mezaranih - grobnih mjesta ne smije biti manji od 0,5 metara.

Član 10.
(Nadgrobni spomenici)

(1) Mezari - grobovi se mogu spajati radi postavljanja nadgrobnog spomenika, odnosno izgradnje grobnice.

(2) Spajanje mezara - grobova iz stava (1) ovog člana vrši se na osnovu saglasnosti JKP „Radnik“.

Član 11.
(Nadgrobni znakovi ili nišani)

(1) Svaki mezar - grob može se obilježiti prikladnim mezaranim - nadgrobnim znakom ili nišanima - nadgrobnim spomenikom.

(2) Visina nišana - nadgrobnog spomenika može iznositi do 1,50 m, a širina najviše do širine mezara - groba, ili širine spojenih mezara - grobova, odnosno širine izgrađene i uređene grobnice.

(3) Saglasnost za postavljanje ili uklanjanje nišana - nadgrobnog spomenika, odnosno zamjenu nišana - nadgrobnog spomenika ili nadgrobnog znaka daje JKP „Radnik“.

Član 12. (Grobnice)

(1) Na mezarju - groblju mogu se graditi grobnice.

(2) Širina grobnice može iznositi maksimalno 1,10 m, a visina s nadgrobnim spomenikom do visine određene u članu 11. ove Odluke.

(3) Saglasnost za izgradnju grobnice daje JKP „Radnik“ uz poštivanje propisa o građenju.

Član 13. (Natpisi)

(1) Tekst natpisa na nadgrobnom spomeniku mora biti napisan s pijetom prema umrlom.

(2) Tekst natpisa iz prethodnog stava ne smije izazivati osjećanja koja mogu uznemiriti građane.

(3) Ukoliko tekst natpisa ne ispunjava uslove iz stava (1) i stava (2) ovog člana, lice na čiji je zahtjev takav tekst ispisan na nadgrobnom spomeniku dužan je isti ukloniti na zahtjev komunalne inspekcije.

Član 14. (Uređivanje mezara - groba)

(1) Mezari - grobovi, mezarne - nadgrobne oznake, nišani - nadgrobni spomenici i grobnice moraju se održavati uredno.

(2) O izgledu mezara - groba staraju se srodnici umrlih i druga zainteresovana lica, prema mjesnim običajima.

(3) Na mezarima - grobovima se može njegoviti cvijeće ili ukrasno šiblje, odnosno mogu se postavljati posude s cvijećem u skladu s Programom iz člana 7. stav (2) ove Odluke.

(4) Na zahtjev srodnika umrlog ili drugih zainteresiranih lica, JKP „Radnik“ može uređivati i održavati mezar - grob uz propisanu naknadu.

Član 15. (Otklanjanje štete)

Ukoliko prilikom ukopa, postavljanja nišana - nadgrobnog spomenika, uređivanja mezara - groba ili grobnice dođe do oštećenja drugih mezara - grobova, grobnica, nišana - nadgrobni spomenika i drugih uređaja na mezarju - groblju u upotrebi, lice koje je vršilo ili na čiji se zahtjev vršili radovi dužno je dovesti oštećenje u prvobitno stanja.

Član 16. (Vršenje zanatskih radova i usluga na grobljima - mezarjima u upotrebi)

(1) Za vršenje zanatskih radova i usluga na grobljima - mezarjima u upotrebi vršit će se pod sljedećim uslovima:

a) JKP „Radnik“ može zabraniti izvođenje zanatskih radova na grobljima - mezarjima ili na njihovim pojedinim dijelovima u određene dane i vrijeme.

b) Radovi na mezarju - groblju treba da se izvode tako da se do najveće mjere očuva mir i dostojanstvo mezarja - groblja.

c) Građevinski materijal (kamen, građa, pijesak i drugo) može se držati na mezarju - groblju samo u potrebnoj količini i za vrijeme vršenja radova, tako da se time ne ometa saobraćaj na mezarju - groblju.

d) U slučaju prekida radova izvođač je dužan radilište bez odlaganja dovesti o svom trošku u prvobitno stanje.

(2) Izvođač radova dužan je se pridržavati odredaba ove Odluke prilikom izvođenja radova na mezarju - groblju.

DIO III - SAHRANJIVANJE - UKOP

Član 17.

(Sahranjivanje - ukop)

Sahranjivanje - ukop umrlih vrši se u mezarjima - grobljima u upotrebi u skladu sa odredbama ove Odluke, na osnovu dozvole za sahranu izdate od mrtvozorske službe.

Član 18.

(Mjesto, vrijeme i način sahranjivanja - ukopa)

(1) JKP „Radnik“ u sporazumu sa porodicom umrlog ili drugim licem koje se stara o ukopu - sahrani određuje vrijeme i način sahranjivanja - ukopa.

(2) Umrli se po pravilu sahranjuje na groblju - mezarju u upotrebi koje se nalazi na području jedinice lokalne samouprave gdje je imao prebivalište.

(3) Umrli se može sahraniti i na groblju - mezarju u upotrebi koje je on odredio za života ili koje odredi njegova porodica, odnosno lica koja su dužna da se brinu o njegovoj sahrani.

Član 19.

(Rok sahranjivanja - ukopa)

(1) Sahranjivanje - ukop umrlog vrši se u vremenu od 24 do 48 časova od nastupanja smrti.

(2) Izuzetno u slučaju smrti od zarazne bolesti ili ako je izvršena obdukcija umrlog, sahranjivanje - ukop se može izvršiti i prije isteka roka iz prethodnog stava uz odobrenje gradske službe nadležne za poslove sanitarne inspekcije.

(3) U slučaju nastupanja smrti u inostranstvu, i na zahtjev porodice, sahranjivanje - ukop se može izvršiti poslije roka iz stav (1) ovog člana.

Član 20.

(Troškovi ukopa)

(1) Troškove sahrane - ukupa umrlog snosi porodica, odnosno nasljednici umrlog.

(2) Ako umrli nema nasljednika ukop će izvršiti JKP „Radnik“ o trošku Grad Zavidovići sredstvima planiranim u budžetu Grada Zavidovići.

Član 21.
(Opremanje umrlog)

- (1) Opremanje umrlog se vrši prema vjerskim i mjesnim običajima.
- (2) Sahranjivanje - ukop i opremanje lica umrlih od zaraznih bolesti se vrši u skladu sa posebnim propisima.

Član 22.
(Prevoz i prenos umrlog)

- (1) Prevoz i prenos umrlog u mrtvačnicu vrši se u mrtvačkom sanduku, odnosno na nosilima koja su za to posebno pravljena i koja se samo u tu svrhu koriste.
- (2) Prevoz i prenos iz mrtvačnice na mjesto ukopa može se izvršiti i bez nosila tako da rodbina i prijatelji nose umrlog, u skladu sa običajima.

Član 23.
(Prevoz posmrtnih ostataka)

Na dan ukopa - sahrane rodbina umrlog može specijalnim vozilom ovlaštenog preduzeća registriranog za bavljenje pogrebnom djelatnošću, izvršiti prevoz posmrtnih ostataka umrlog iz mrtvačnice direktno u vjerski objekat (džamiju ili crkvu) bez formiranja povorke radi obavljanja vjerskog obreda.

Član 24.
(Vjerski obredi)

Na groblju - mezarju u upotrebi se mogu vršiti vjerski obredi koji važe i koji se primjenjuju uz nacionalnu i vjersku pripadnost umrlog u skladu sa Zakonom o slobodi vjere, pravnom položaju crkvi i vjerskih zajednica u Bosni i Hercegovini („Službeni glasnik BiH“, broj: 5/04).

Član 25.
(Pogrebna povorka)

Nakon završetka pogrebnog obreda pred mrtvačnicom, odnosno vjerskog obreda pred vjerskim objektom (džamijom ili crkvom), formira se pogrebna povorka i posmrtni ostaci se prenose do mezarja - groblja u upotrebi.

Član 26.
(Pokopavanje i zatvaranje mezara - grobova)

- (1) Čim se posmrtni ostaci spuste u mezar - grob, on se mora zasuti zemljom, odnosno grobnica zatvoriti.
- (2) Pokopavanje i zatvaranje mezara - grobova vrše lica koja angažuju srodnici ili lica koje je dužno da se brine o sahrani umrlog, kao i prenos umrlog do mezara - groba ukoliko to ne vrše srodnici ili drugi građani.

Član 27.

(Određivanje mezarnog - grobnog mjesta)

- (1) Određivanje mezarnog - grobnog mjesta vrši JKP „Radnik“.
- (2) Mezar - grobno mjesto koje je dato na korištenje JKP „Radnik“ može ustupiti drugom licu samo uz saglasnost porodice kojoj je odobren mezar - grobno mjesto.

Član 28.

(Visina naknade)

Visina naknade za ustupanje na korištenje mezara - grobnog mjesta iz člana 27. ove Odluke određuje JKP „Radnik“.

Član 29.

(Cjenovnik)

Naknada za vršenje pogrebnih usluga i ostalih usluga vezanih za upravljanje i održavanje mezarja - grobalja u upotrebi se utvrđuje cjenovnikom komunalnih usluga koje pruža JKP „Radnik“ d.o.o. Zavidovići.

DIO IV – EKSHUMACIJA I ISKOP POSMRJNIH OSTATAKA

Član 30.

(Ekshumacija)

- (1) Iskopavanje i / ili prenos posmrtnih ostataka (ekshumacija) iz mezarja - groblja na području Grada Zavidovići iz jednog u drugo mjesto, odnosno izvan Grada Zavidovići, vrši se na osnovu odobrenja sanitarnog inspektora ili akta nadležnog organa.
- (2) O iskopu i / ili prenosu posmrtnih ostataka prethodno se obavještava Policijska stanica Zavidovići i pravno lice koje upravlja mezarjem - grobljem.

Član 31.

(Iskop i prenos posmrtnih ostataka)

- (1) Iskopavanje i prenos posmrtnih ostataka u drugo mezarje - groblje vrši se na osnovu odobrenja sanitarnog inspektora ili akta nadležnog suda zavisno od razloga za vršenje iskopa i porenosa posmrtnih ostataka.
- (2) O iskopu i prenosu posmrtnih ostataka prethodno se obavještava Policijska stanica Zavidovići i pravno lice koje upravlja mezarjem - grobljem.

Član 32.

(Uređenje mjesta iskopa)

- (1) Pravno ili fizičko lice koje je vršilo iskop posmrtnih ostataka dužno je mjesto iskopa dovesti u uredno stanje.
- (2) Troškove iskopavanja i prenosa posmrtnih ostataka iz prethodnog stava snosi lice ili nadležni organ koji je tražio iskopavanje i / ili prenos posmrtnih ostataka.

DIO V - NADZOR

Član 33. (Nadzor)

Nadzor nad provođenjem ove Odluke vrši Služba za upravu poljoprivrede, vodoprivrede i komunalnih poslova.

Član 34. (Inspeksijski nadzor)

Inspeksijski nadzor nad provođenjem ove Odluke vrši gradski komunalni inspektor.

DIO V - KAZNE NE ODREDBE

Član 35. (Novčane kazne za pravna lica)

(1) Novčanom kaznom u iznosu od 300,00 KM do 1.500,00 KM kaznit će se JKP „Radnik“, za radnje koje imaju obilježja prekršaja kako slijedi:

- a) Ne vrši uređivanje i održavanje mezarja - groblja (članu 7. stav (1)),
- b) Ne donese Program uređenja i održavanja mezarja - groblja (člana 7. stav (2)),
- c) Ne održava mezarje u urednom stanju (član 9. stav (1)),
- d) Ustupi mezar - grobno mjesto bez saglasnosti porodice (član 27.).

(2) Za prekršaj iz stava (1) ovog člana kaznit će se odgovorno lice u pravnom licu u iznosu 100,00 KM do 500,00 KM.

Član 36. (Novčane kazne za fizička lica)

(1) Novčanom kaznom u iznosu od 100,00 do 1.000,00 KM kaznit će se fizičko lice ako:

- a) Ne poštuje zabranjeno ponašanje i radnje na mezarju - groblju (član 8.),
- b) Ne poštuje propisana pravila ukopa (član 9.),
- c) Vršiti spajanje mezara - grobova bez saglasnosti JKP „Radnik“ (član 10.), obilježava mezar - grob neprikladnim spomenikom ili spomenikom nepropisnih deimezija (član 11.),
- d) Gradi grobnicu bez saglasnosti ili suprotno saglasnosti JKP „Radnik“ (član 12.),
- e) Ispiše tekst na nadgobnom spomeniku koji izaziva osjećaj uznemirenosti građana (član 13.),
- f) Ne vrši održavanje mezara - groba u urednom stanju (član 14.),
- g) Izvrši oštećenje mezara - grobova, grobnica, nadgrobni obilježja i oštećenja drugih uređaja na mezarju - groblju (član 15.),
- h) Vršiti zanatske radove na groblju na nepropisan način (član 16.),
- i) Ako ne izvrši pokopavanje i zatvaranje mezara - groba (član 26.),
- j) Vršiti ekshumaciju bez odobrenja sanitarne inspekcije (član 30. i 31.),
- k) Ne dovede u uredno stanje mjesto ekshumacije (član 32.).

- (2) Za prekršaj iz stava (1) tačka a), b), d), g), h), j) i k) kaznit će se pravno lice novčanom kaznom 300,00 KM do 1.500,00 KM.
- (3) Za prekršaj iz stava (2) ovog člana kaznit će se odgovorno lice u pravnom licu u iznosu 100,00 KM do 500,00 KM.

DIO VI - PRIJELAZNE I ZAVRŠNE ODREBE

Član 37.

(Upravljanje ostalim mezarjima - grobljima)

(1) Mezarjima - grobljima u vlasništvu vjerskih zajednica i crkve, mjesnih zajednica ili fizičkih lica upravljaju i održavaju vlasnici mezarja - grobalja.

(2) Na mezarja - groblja iz stava (1) ovog člana primjenjuju se odredbe ove Odluke kojima su propisano održavanje mezarja - grobalja i mezara - grobova.

Član 38.

(Evidentiranje)

Služba za upravu geodetskih, imovinskopravnih poslova i urbanizma će u saradnji sa mjesnim zajednicama i vjerskim zajednicama na području Grada Zavidovići evidentirati u katastru nekretnina sva mezarja - groblja na području Grada Zavidovići u roku od 12 mjeseci od dana stupanja na snagu ove Odluke.

Član 39.

(Finansiranje)

Za održavanje i uređenje mezarja - groblja u upotrebi obezbjeđuju se sredstva u Budžetu Grada Zavidovići.

Član 40.

(Stupanje na snagu)

Ova Odluka stupa na snagu prvog narednog dana od dana objavljivanja u „Službenom glasniku Grada Zavidovići“.

**PREDSJEDAVAJUĆI
GRADSKOG VIJEĆA**

Admir Fojnica, prof.

OBRAZLOŽENJE

USTAVNOPRAVNI I ZAKONSKI OSNOV ZA UVOĐENJE ODLUKE

U članu 3. stav (2) tačka d) Zakona o komunalnim djelatnostima Zeničko-dobojskog kantona („Službene novine ZDK“, broj: 17/08 i 09/11) propisano je: Komunalne djelatnosti zajedničke komunalne potrošnje u smislu ovog zakona su:

„d) Održavanje grobalja i njihove prateće infrastrukture,“.

U članu 4. stav (15) Zakona o komunalnim djelatnostima Zeničko-dobojskog kantona propisano je: „Pod održavanjem grobalja podrazumijeva se upravljanje, održavanje i uređivanje prostora i objekata (mrtvačnica u sklopu groblja, kapela i slično) za obavljanje ispraćaja i sahrane umrlih lica;“.

RAZLOZI ZA UVOĐENJE ODLUKE I OBJAŠNJENJE ODABRANE POLITIKE

S obzirom na to da Zakon o grobljima i pogrebnoj djelatnosti nije donesen na federalnom, a ni kantonalnom nivou, da bi se pristupilo proceduri određivanja lokacije i izgradnji gradskog groblja potrebno je donijeti Odluku o mezarjima - grobljima i pogrebnoj djelatnosti na području Grada Zavidovići.

Ovom Odlukom se uređuje način upravljanja mezarjima - grobljima u upotrebi, izgradnja novih, uslovi uređivanja i održavanja mezarja - groblja, uslovi za ustupanje i način utvrđivanja naknade za korištenje mezarjskih - grobnih mjesta i drugo.

Na osnovu navedenog predlaže se donošenje ove Odluke.

USKLAĐENOST ODLUKE S KANTONALNIM I FEDERALNIM ZAKONODAVSTVOM

Ova Odluka usklađena je sa Zakonom o komunalnim djelatnostima Zeničko-dobojskog kantona i Zakonom o prostornom uređenju i građenju.

Federalnim propisima i propisima Bosne i Hercegovine nije uređena ova oblast.

OBRAZLOŽENJE PRAVNIH RJEŠENJA U ODLUCI

U članu 2. Odluke propisana su mezarja - groblja na koje se primjenjuju odredbe iste.

Način izgradnje i formiranja novih mezarja - groblja na području Grada Zavidovići propisan je u članu 4. Odluke. Također je istom odredbom JKP „Radnik“ d.o.o. Zavidovići povjereno upravljanje i održavanje mezarja - grobalja u vlasništvu Grada Zavidovići.

Članom 7. i 8. Proisana su ovlaštenja JKP „Radnik“ d.o.o. Zavidovići u obavljanju poslova upravljanja i održavanja mezarjima - grobljima.

Usluge koje JKP „Radnik“ d.o.o. Zavidovići plaćat će se na osnovu cjenovnika komunalnih usluga koje pruža navedeno preduzeće, što je propisano u članu 32. Prijedloga Odluke.

U članu 37. propisano je upravljanje i održavanje mezarja koja nisu u vlasništvu Grada Zavidovići.

PROVEDBENI MEHANIZMI I NAČIN OSIGURAVANJA POŠTIVANJA ODLUKE

Provođenje ove Odluke kao i nadzor nad njegovom primjenom povjeren je Službi za upravu poljoprivrede, vodoprivrede i komunalnih poslova i inspeksijski nadzor komunalnoj inspekciji.

Poslovi upravljanja i održavanja mezarja - groblja u upotrebi povjereno je JKP „Radnik“ d.o.o. Zavidovići.

OBRAZLOŽENJE FINANSIJSKIH SREDSTAVA ZA PROVOĐENJE ODLUKE I FINANSIJSKI EFEKTI ODLUKE

Za provođenje ove Odluke potrebno je obezbijediti sredstva u Budžetu Grada Zavidovići za održavanje grobalja u vlasništvu Grada Zavidovići.

OPIS KONSULTACIJA VOĐENIH U PROCESU IZRADE ODLUKE

U toku izrade ove Odluke nisu vršene konsultacije i one će se vršiti tokom provođenja javne rasprave po Nacrtu Odluke.

GRADONAČELNIK

doc. dr. Hašim Mujanović

Obradio: _____
(Amir Mahmutović)

Kontrolisao: _____
(Izet Bašić)